

Mr. Nicole Hoevertsz ta ocupa un posicion di mas halto cu un Arubiano a yega di ocupa na nivel Internacional, como miembro di IOC

HOPI Arubiano no por comprende cu nos mester ta hopi orguyoso di mr. Nicole Hoevertsz, kende apesar di ta un persona sumamente senciyu, ta ocupa un posicion asina importante y eleva na nivel Internacional. Poco ta e paisnan grandi cu tin un persona como miembro di IOC, e organisacion mas prestigioso cu por ta existi na nivel Internacional.

Nicole a yega asina leu door di su meritonan, door di perse-

verancia y su trabou duro pa deporte mundial. Ora cu mi a wak un programa di television Hulandes con aprecio nan tin pa e trabou cu Prins Willem Alexander a haci den IOC, Comité Olimpico Internacional, y cu e retiro di e prins di e prestigioso organisacion aki, Hulanda ta perde su posicion y kisas lo no hay'e bek, debi cu ta miembronan di IOC ta dicidi, kende ta bin na su luga.

Ora mi tende con orguyoso

Hulanda ta di tin un miembro, den persona di e Prins, den IOC, segun nan siendo un pais asina chikito, mientras nos ta considera Hulanda gigante, anto nos mester ta super convenci cu nos tin un persona asina respetu na nivel mundial. Un pais chikito ariba mapa mundial, e di 8 pais mas chikito ariba mapa, cu un representante digno den IOC.

Nicole ta pasa pa duna lec-

tura den diferente paisnan den mundo, awe e por ta den e continente aki y mañan den otro continente. IOC tin solamente 105 miembro y tin mas di 200 pais miembro, anto nos pais stima tin un representante den IOC. Nicole ta un di e poco Arubianonan cu ta reuni cu mandatario di paisnan grandi rond mundo y di paisnan menos grandi tambe.

Mi mes a propone Nicole pa varios reconocimiento, pero ta un lastima cu aki na Aruba hopi reconocimiento ta bay pa politicianan, cu ta ser paga pa hacinan trabou, pero pa esunnan cu ta haci un trabou voluntario, manera loke Nicole ta haciendo no ta bin na remarca.

Ta duél'mi cu diferente proposicionnan cu a bay pa nos Gobernador pa reconoce Nicole, no a haya un contesta positivo o ainda cierto hendenan no ta comprende e magnitud di e trabou cu Nicole ta haci pa un pais asina chikito.

Nicole un cos ta sigur cu esunnan cu sa kico esaki ta nifica si ta comprende bo balor y trabou, sigui padilanti y ohala mas Arubiano lo ser motiva pa hacinan trabounan voluntario di asina peso y ariba nivel Internacional. Pabien Nicole, sigui padilanti. Atan Lee, un Arubiano cu ta duna reconocimiento na esunnan cu ta duna nos pais un nomber grandi ariba nivel local y Internacional, voluntariamente.